

愚

齋

存

稟

愚齋存彙卷第四十七目錄

電報二十四

劉峴帥來電

西安榮中堂來電

張香帥來電

又

又

劉峴帥來電

寄江督劉峴帥鄂督張香帥東撫袁慰帥

袁慰帥來電

又

張香帥來電

袁慰帥來電

張香帥來電

寄榮中堂

袁慰帥來電

劉峴帥來電

慶親王李中堂寄軍機處電

寄北京德使穆大臣

張香帥來電

寄北京李中堂

寄江鄂東三督撫帥

劉峴帥來電

寄張香帥

袁慰帥來電

寄江督劉峴帥鄂督張香帥浙撫惲菴帥

寄杭州惲中丞

寄西安王中堂

寄杭州惲中丞江鄂兩督帥

寄北京慶王李相

王中堂來電

浙撫惲中丞來電

寄惲中丞

惲中丞來電

又

行在軍機處王中堂鹿尚書來電

寄王中堂鹿尚書

保定電員張毓樹來電

寄江鄂東督撫帥

寄惲中丞

寄慶親王李中堂

行在王中堂鹿尙書來電

張香帥來電

劉峴帥來電

寄廣州德靜山制軍

寄西安王中堂

袁中丞來電

粵督德靜帥來電

寄江鄂督帥山東撫帥

袁中丞來電

寄江鄂督帥山東撫帥

寄李中堂

張香帥寄各駐使電

劉峴帥來電

張香帥來電

劉峴帥寄日本李星使電

寄李中堂

寄江鄂督帥山東撫帥

李中堂來電

劉峴帥來電

袁中丞來電

寄劉峴帥

東京李星使覆峴帥香帥電

寄南昌張護院紹華

張香帥來電

袁中丞來電

劉峴帥來電

寄萍鄉顧令家相張令贊宸

劉峴帥來電

寄張香帥

倫敦羅大臣寄香帥電

峴帥寄日本李大臣電

美京伍大臣寄峴帥電

袁中丞來電

又

寄李中堂

寄西安王中堂鹿尙書

張香帥來電

又

又

寄江鄂川督帥山東撫帥

張香帥來電

寄江鄂督帥

寄江皖鄂川湘東豫贛閩粵督撫將軍

寄西安榮中堂王中堂鹿尙書

愚齋存彙卷第四十七

電報二十四

劉峴帥來電

光緒二十六年十月十三日兼致香帥慰帥

慰帥致榮相續電極佩弟恐諸謬未必有恥耳會
奏事既奉調董赴甘 諭旨本可不發然降調革
留諸臣尙無後命仍以電奏爲是香帥所論哲美
森及木齋齊電兩節鄙見哲談內聞未知木齋雖
並致榮王所謂自辦正與此奏相合似可不必辯
正轉涉痕跡奏稿擬就請斧政由鄂逕發此奏發
後卽可將慰帥所擬劾董摺速商各省續發矣奏

稿如下 行在軍機處鈞鑒近聞洋兵西徧已抵井陘太原戒嚴宣化居庸等處洋兵不少晉防萬緊坤一之洞迭電各出使大臣各外部勸阻彼族均涉推宕連接各處電報外人總以懲辦禍首未能滿意毓賢董福祥尤爲各國所切齒聞已預備哀的美敦書允之則必有爲難拒之則立致決裂時局至此恐終歸於不能不允坤一等竊謂此次議款當握定不失自主之權爲第一要義賞功罰罪 中朝自有權衡本非外人所得干預肇禍諸臣縱匪滋擾貽害 國家得罪於 宗廟社稷

乘輿播遷備常艱險得罪於 皇太后 皇

上大局阽危生靈塗炭得罪於天下臣民圍攻使館妄殺洋人得罪於海外諸國種種罪戾擢髮難數卽令諸臣自思當亦無顏再生於堯舜之世卽無各國要素當亦不能倖逃於祖宗之法 聖朝

忠厚 兩宮仁慈或念其隨扈微勞不忍遽置

重典似不宜令其再竊高位再誤國是擬請斷自

宸衷明降 諭旨將載瀾趙舒翹英年一併革

爵革職剛毅查辦拳匪語多縱庇雖已病故仍請革職毓賢董福祥情節較重法無可遁請立正典

刑董福祥現在調回甘肅或俟抵甘後再行治罪
伏候 聖裁一面速發國書切商各國迅發訓條
議結或冀早就範圍與其待彼書到迫以必辦損
我國體何如趁書未致先行自辦伸我大權事機
危急諸臣罪有應得坤一等不敢徇外人之好惡
不敢不爲 朝廷整紀綱謹冒死瀝陳請代奏云
西安榮中堂來電十月十三日兼致峴帥香帥慰帥
慶邸傅相電謂十國先後照會應將董驅逐遠離
不得仍在 朝廷左右並請嚴子處分調離 行
在明降 諭旨以釋各使之疑昨已奉 旨將董

革職留任其所部各軍現已裁撤五千五百人並著帶其親統各營剋日馳回甘肅矣緣陝甘軍民附之者太眾勢不得不暫爲羈縻徐圖安置此意執事自當洞澈也

張香帥來電

十月十三日兼致峴帥慰帥

劾董宜電奏勝於電樞惟結尾必略有辦法恐董陽請罷而隱以部眾怵政府也眾建少力似是穩著但辦法宜參活筆仍請敕樞臣妥籌只算條陳備采耳諸公如別有良謀不用此策亦可或俟

明旨調開後再發或此時卽發統請峴帥改定斟酌

酌鄙見遲兩三日無妨各省擬約東皖蘇浙閩粵
請由甯發簡電速商川前有電言劾董有四可慮
可不必約

又十月十三日

各國雖請誅十一人然其中必有等差除毓董外
所最恨必欲殺者爲誰速密確示此語有人託問
非閒話想能心照望轉傳相密復

又十月十三日兼致岷帥慰帥

陝探文電董今日 陸辭歸里其軍何人接統尙
不知又聞有誅毓意等語此電非出要人然不甚

虛峴帥錫午申法保權會電須速奏較電樞爲勝
惟鄙意注重在餘人一律全予罪名以便發國書
止美敦若餘人不罪美敦斷不能阻或聲明若全
權擬奏必不止請重辦一人某等此奏不過爲暫
救眉急藉視各國之情狀則與全權有別矣抑或
如何措詞方周妥有益統請峴帥酌定速發不必
再商

劉峴帥來電

十月十三日兼致香帥慰帥

董已調甘遲數日即可將濟稿上陳疏尾辦法必
須請正法厥罪甚重留之無益請香帥再酌申法

保權稿頃已電達務祈改正速發鄙見毓董外未
便指請嚴辦某人只能做到請革爲止發國書一
節只能商各國速議結未便請止發美敦能允速
議則止美敦自在其中矣

寄江督劉峴帥鄂督張香帥東撫袁慰帥

十月十三日

甯奏保權申法沈痛切實四重罪案一無可追西論端
剛毓董四凶並重餘無甚軒輊端圈剛死董逐目前只
能請殺毓如毓董並請恐一羈縻而兩皆擱起可否於
情節最重句上刪去董福祥三字調回甘肅之下刪去
或字再行治罪之下加已革端郡王載漪莊親王載勛

貝勒載瀜聞有赴甯夏等處者請卽派親信大臣前往
押赴 行在先行圈禁以杜外人啟疑轉致再請加重
下接伏候 聖裁仍乞三帥裁定速發董狀尙宜略緩
頃西安來電昨 旨行在不宣以全體面可見爲難已
極

袁慰帥來電 十月十三日

陝探元電聞董請訓 召見 兩宮慟哭卽帶

隊回籍毓恐不保云

又 十月十三日兼致峴帥香帥

十國只請逐董現已明發照辦疆臣踵請誅之似

不安董 恩眷尙未衰迫于勢不得不逐宜先痛
劾其罪狀結尾仍用活筆不必顯正法典刑字樣
先破其寵再圖誅之較妥鄂論申法保權各節極
透澈請兩帥速奏劾董奏宜稍緩預約各省以待
機會

張香帥來電

十月十四日

有人於九月閒出京來鄂者云傳聞各國議索誅
十一人外尙有次等十六人須流遣確否閣下必
有所聞如知其詳祈將十六人姓名電示至十一
人爲誰亦望開示此似漏洩無妨務請卽電復

袁慰帥來電 十月十四日兼致峴帥香帥

甯擬奏雄健嚴正欽佩莫名誅董一議誠如杏兒
所慮宜稍緩莊端澄押赴 行在恐未必認真圈
禁轉生煽惑請審酌

張香帥來電 十月十四日

元辰電詢傅相十一人中各國最注意必誅者有
幾人係何人此係有人託問故云非閒話問亥電
似未會鄙銜仍望速電傅相

寄榮中堂 十月十四日

元電已轉慶邸李相劉張袁三帥及各駐使以備外人

詰問時相機因應日來各總領事詢端莊兩邸聞在甯
夏奉養 旨後未必遵 旨圈禁又云董赴甘將與兩
邸合謀等語答以決無其事能否告以端莊邸濫貝勒
現居何處以釋其疑免再藉口

袁慰帥來電 十月十五日

自五月來拒拳黨勦拳匪誅王大臣所派募拳之
員三人請保使効禍首並設法爲各使通電艱險
備常幾遭不測如聯軍犯東境拒之則立見糜爛
不拒則 國法難逃不但無以對全省官民且爲
拳黨拳匪所笑請切託德領設法勸阻伊如何復

答迅示至懇現愈來愈近恐將大糟

劉峴帥來電 十月十五日兼致慰帥

東省偏近直境保教辦匪較他省尤難措手半年
來幸賴慰帥煞費苦心竭力籌辦始得化險爲夷
中外商民獲享安居之樂爲各國所共知前者德
總領事曾轉述德國國家美意坤亦同深感佩今
洋兵行近東省商民已極驚慌若至東境地方勢
必擾亂不特山東全省震驚在東德人亦必深受
擾累且於東南保護大局深有關繫務請杏兄將
此電密致德總領事切託速懇穆大臣轉商各國

務令洋兵勿入東境爲禱

慶親王李中堂寄軍機處電 十月十五日

據俄德英義奧日本日比八國先後照會稱八月二十六日 上諭加賞李秉衡之子孫以示篤念忠貞之臣加恩酬賞自屬理所當然但此次李秉衡故後 恩卹殊令輿情趨入歧途政府諸臣雖明與各國重商結好恐仍存如李秉衡顯恨泰西之心李秉衡夙與西人爲仇由南省北來途次督拳民攻燬教堂迨入京後圍攻使館極力加功大臣有與泰西輯睦者附和僉人而陷害之其死也

乃與救使聯軍對敵所致如斯忠貞果爲國乎必
應力行駁辯並請嗣後勿再降此項 諭旨等語
查李秉衡在東撫任內虐待教士致有膠州之失
蒙 恩降調不再起用今復令帶兵自贖徒有嫉
洋之志實無勝敵之方貽害 君國死不足惜茲
因 明詔優卹廕後致騰眾謗現將開議和局萬
不可敗應否俟其條款到時撤銷李秉衡卹典以
示大公請代奏

寄北京德使穆大臣 十月十五日由李傅相譯送

貴國現由青島特造水線至烟台自爲大局起見惟烟

台至上海中國電報公司已託英丹兩國東北公司代
造水線費鉅料堅所有烟台至上海各國官商電報無
不格外神速且此綫現歸東北公司代理二十五年斷
無漏洩遲延之弊貴國只爲接遞烟膠電報必當吩咐
電局格外傳遞妥速似可不必另設烟台至上海水線
徒費鉅款素蒙關愛用特電懇貴大臣迅速電商貴國
政府爲幸

張香帥來電

十月十六日兼致峴帥慰帥

寒電馳系以閏月德政府電各督撫聽外閒謠言
殊堪詫異云云印證之似不至入東境必是毀景

州以報陳澤霖之役

寄北京李中堂 十月十六日

慰帥銑急電稱洋兵馬步礮續有四千分枝擾靜海青
縣滄州南皮東光鹽山慶雲等屬兩三日均陷行蹤甚
速勢焰猛烈緊逼東境西北各屬似不僅在景役已入
告梅章軍均退散等語據滬德克領事云德兵決不犯
東境但東光慶雲入東境止數十里乞與瓦帥穆使言
之正在議約免生衅端

寄江鄂東三督撫帥 十月十六日

頃克領事來已將甯濟電譯看並切告德軍蹂躪東省

必於商務鐵路大損克云前已訂定不犯東境未聞改
意決不相犯詰以若他國兵犯如何克云瓦帥統各軍
德不犯他國亦不犯囑其電穆使克云袁已電穆必有
回電請卽將我話代復又再三諄告距德只數十里袁
帥恐迎拒兩難遂將翰電詳告克云長江前亦有此等
謠言我告閣下無事閣下向我無謊言我亦決無謊語
其言似有把握傅相與瓦帥約定不赴滄州或竟如鄂
電報景州仇亦未可料慰帥續得探報乞示

劉峴帥來電 十月十七日

克領與執事問答語極切實似尙可信但洋兵相

偪太近萬一入東境轉覺迎拒兩難旣驗全權憑
據似已開議何復用兵不已請電邸相設法勸阻
少到一處百姓少喫一分苦不僅山東受福也條
款有所開否

寄張香帥 十月十七日

傅相諫電各國請辦十一人除毓董外最恨者端莊瀾
英但求從重圈禁無可再重英趙褫職亦不滿意礙難
先奏只俟開議次等十六無聞希復香帥云

袁慰帥來電 十月十八日兼致峴帥香帥

西安來電 兩宮甚和諸事商酌辦理上有

宗社爲重管不了他們之語昨諭慶李遵便宜
行事 旨速卽開議云如趁此邸相有奏擬必可
得力杏兒能達京否

寄江督劉峴帥鄂督張香帥浙撫惲菘帥

十月十八日

頃邸相嘯電奏頃據英薩使照稱浙撫劉樹堂因衢州
教士被害案去任藩台惲祖翼接任該藩司顯恨西人
較劉撫尤甚不應令其接替請一體屏退並凡有交涉
之缺不再補放且請將劉撫留浙俟關係英教士案內
各員處分定後再聽離省等語查自今夏拳匪肇亂各
省教案迭出操縱兩難浙東民氣浮動攻教尤甚劉惲

非必與洋人爲仇辦理或有未當之處該使聽領事等
一面之詞持論過激不易調停應如何處治伏候 聖
裁請代奏云乞秘

寄杭州惲中丞

十月十九日

頃晤霍領事言甚多尤要在重懲鮑道及城守周之德
已將官紳開單面交問答卽鈔寄霍於公無貶詞乃接
全權電奏甚詫異擬卽託霍疏通並飛電仁和請香帥
電定興以冀挽回

寄西安王中堂

十月十九日

衢州教案戕英美十一人英國初欲派兵赴浙照保定

辦法必欲拏問官員南洋劉制台及劉撫惲藩電託宣設法阻止舌敝唇焦方與英國專辦交涉之總領事霍必瀾及美總領事古納商定允不進兵卽歸中國自行懲辦惲撫接印後已將在逃之已革鮑道拏獲正在商酌從嚴參辦並將劉撫去任實因此案辦理不善告知英美領事其忿稍平惲撫已函復霍必瀾請由宣代爲調處今日又與霍晤商彼欲正法鮑道及城守紳士等數人並面交一單訂明先由惲撫商擬辦法告知該領事請示英廷彼此允洽再行奏結霍又云惲任江漢關道時霍爲漢領事辦理交涉甚好乃散後接閱慶邸李

相嘯電英使照會惲與劉皆不容其中或有誤會今夏
宣接准劉張兩督會同咨請在滬與各國總領事籌議
保護東南各省使聯軍不得侵犯長江各處以符聯絡
一氣各保疆土之 旨其時浙江本不在內先據惲祖
翼電懇附入許督劉撫電來在後夏秋溫衢兩處鬧教
得以洋兵不入浙境現在衢案兇犯至今未辦洋兵致
欲赴勦一經竭力勸阻仍允歸我自辦未始非惲祖翼
前請附入保護之功今英使不知因何誤聽又欲干我
朝廷用人之權可否先由宣切告霍必瀾令其電致
英使辯正之處乞示

寄杭州惲中丞江鄂兩督帥 十月十九日

邸相效電頃奉電 旨奕劻李鴻章嘯電悉浙江交涉
事件關係緊要惲祖翼旣升巡撫必應妥辦何至預存
成見深恐洋人所言並無實據衢州教案現已電飭惲
祖翼迅速持平辦結如果該撫辦理未能妥協應如何
處置之處 朝廷自有權衡決不徇庇此 旨著奕劻
等詳告英使務釋其疑欽此宣謹轉

寄北京慶王李相 十月十九日

衢州戕英美十一人英領霍必瀾稱衢道鮑祖齡指使
又稱劉撫行文致有戕殺聲言欲照廷雍辦法經宣勸

阻已商允中國自行懲辦惲撫接任已將在逃鮑革道
拏獲正在商擬嚴辦惲已函霍請宣調處今夏宣承劉
張之託訂互保之約先無浙省惲力請得附温州開教
撤去知府拏獲匪首化爲無事皆惲之力衢州釀案實
非藩司之咎如詢霍領必知其實乞轉告英使

王中堂來電 十月二十日

阻止洋兵赴浙非執事不能辦此告霍電知英使
更正惲議一節卽請速行

浙撫惲中丞來電 十月二十日

蒙寄摺稿閱悉此係劉之左右伍元芝朱榮瓌等

所爲觀其欲劉留任顯露馬脚乞將此意密達仁
和若再回任兩浙去矣伊等與英日駐杭領事往
還最密小田切處經我公一言解紛英領事則未
及也公使處託霍疏通最妙此後督撫任外人去
留豈 朝廷竟無主權耶今年保護洋人不遺餘
力卽如夜半發電立約力阻省垣招集義民萬目
昭彰此其明證乃顛倒言之殊無天理

寄惲中丞

十月二十一日

頃邸相電奏前據英使照稱温州武員與教爲仇致滋
事當經電知浙撫茲接惲撫復統領范銀貴護鎮胡碩

功聲名甚劣已撤差參辦又衢州教案屬盛宣懷與滬
領事調處擬嚴辦是憚撫於交涉尙能盡心並無顯恨
西人自應無庸屏退卽商英使知照請代奏云

憚中丞來電 十月二十一日

奏稿拜讀數過精神俱震公之擔當我之委曲均
得上達 天聽誠爲快事 諭旨下來尙存 國
體想係仁和執筆公奏于我 朝政用人之權一
語有萬斤重也現以解釋公使爲第一要義公已
託霍又復請 旨鄭重出之用彼所信釋彼所疑
從此鬼魅不能爲祟而後來共事亦易公之氣魄

識力何止加人一等感激佩服豈言可罄

又 十月二十一日

今晨所發電奏諒已邀覽初意擬附片奏請我公
辦理衢案措語較詳適蒙電 旨詢問只可電復

雖略將我公表彰而意未盡也嗣後交涉之事愈
多愈難偉略如公環顧無兩擬俟衢案奏結之時
將我公不世才猷兼人智勇詳細陳奏並將願全
東南大局保全浙江一省苦心毅力痛切言之純
係公義毫無私情一片血誠縈迴寤寐莫知其所
以然想公之待我亦復如是卽如衢案非公豈能

措手杭紳私議謂盛京堂關切浙亦實是關切
輿論豈盡誣耶

行在軍機處王中堂鹿尚書來電十月二十二日

轉江督箇電誦悉賠款無出不能不計及加稅上
年執事首創此議深費一番苦心仍希隨時電商
邸傳始終贊成切盼

寄王中堂鹿尚書十月二十三日

前議加稅專指洋貨照洋藥稅釐併徵歲盈千餘萬至
二千萬有利無害其時數大國已首肯惜爲言官阻撓
現今時移勢易竇納樂已調開赫德將返國更難復議

但如赫德節略所稱中國若不豫籌善策各國必自定辦法戶政一奪吏禮兵刑工各有掣肘晝夜焦思保我主權必須趕緊示以實在辦法不能力籌鉅款卽不能取信外人似尙不止加稅一端奉諭始終贊成深慚螻臂不足當車頃已轉請邸相與赫德面商能否索議賠款時籌及竇赫前云加稅關係商務將來須在滬就洋商籌議頃商裴式楷仍宗此說

保定電員張毓樹來電

十月二十四日並致陝撫岑帥東撫袁帥

各國有約南不入德州西不過獲鹿惟彼族聞有幸蜀之奏與我全權面言若不回鑾擬另立明

裔慶邸李相甚懼特派楊守來昭赴行在面請
榮相代奏一切機要並聞各國訓條已到我全權
恐一經開議所索未能限內卽復故反推宕俟楊
到秦事有就緒再與開議現廷意允毓重辟董
自請罪有旨革職回任南路德兵往來南皮吳
橋西路法兵游弋深祁等處尙與所約不悖

寄江鄂東督撫帥十月二十五日

保定孫署臬鍾祥寄密電昨慶邸派候選府楊來昭赴
行在過保面談述及傳聞何乃瑩有奏請幸蜀之
說各國以爲如不回鑾擬另立明裔慶李聞之甚懼

特派楊守赴陝面詢榮相有無此奏並陳一切機要請
代奏聞現尙未開議惟德中梗必欲嚴懲禍首並須
回鑾始簽約毓賢已允重辟董自請罪奉 旨革職飭
回本任外人仍嫌處分太輕要素條款賠兵費四百兆
譯署改外部祇准留慶邸一人閣部督撫勿用旗人並
設洋員監政礦務關稅歸彼經理大致與傳聞各款相
同各國與慶邸情意尙洽云

寄惲中丞

十月二十五日

箇電萬分感愧弟名心久淡矧時局益危路廠方待求
替遑論其他東南大局實賴劉張魄力弟將命而已保

浙人皆爲我握汗若非我兩人私交恐愚不至此浙紳私議入我肺腑號電非牢騷竊慮政府疑我虛誑耳公電奏未閱及

寄慶親王李中堂 十月二十五日

聞兵費有六萬萬之說恐難減但與商分期三十年繳清免出利息如允每年二千萬加稅辦成卽有此數歐洲向來兵費可分期並不出利如有大沽礮台等款本難刪駁或卽暫作抵押還清爲限妄參末議恭呈鈞酌行在王中堂鹿尙書來電 十月二十五日

漾電悉所稱保我主權非趕緊示以實在辦法不

可洵爲切要之論其實在辦法如何下手想執事必能妥籌善策已詳告邸相否仍希密示一切爲荷

張香帥來電 十月二十六日兼致峴帥慰帥

滬兩徑悉各款內閣部督撫勿用旗人一條設洋員監政一條最難允監政是否專指財政抑統監內外各衙門之政要素至尙洽一段是否全係保定電是否均係楊守語可靠否均望明示竊思若用人限籍貫庶政有監員則自主之權失矣彼不過不放心恐將來仇洋人尙不如勸我除弊變政

猶存自主之權也 朝廷若肯變法行新政則旗
員奉行尤力庶政不監而自無弊矣尊意以爲何
如祈速籌復

劉峴帥來電

十月二十六日兼致香帥慰帥

滬兩徑電悉何係剛黨敢爲邪說以撓大計已電
榮如有此奏嚴斥勿用條款果確已失自主之權
決不可允請杏翁電京預爲設法改易勿待美敦
書到允拒兩難

寄廣州德靜山制軍

十月二十六日

頃接 行在電詢兩廣逆黨倡亂失地不少此說由蜀

傳來屬爲探訪云自惠州事平後有無他處猖亂乞速示

寄西安王中堂 十月二十六日

洋人最信新聞已解其疑靜帥昨有電來蜀信似不確

袁中丞來電 十月二十七日

保定張毓樹電或欠斟酌可否請飭其毋電西安
明齋一語不可輕說

粵督德靜帥來電 十月二十七日

惠州土匪現已按鄉搜除一律肅清全省各屬安
靜無事卽惠匪猖獗之時亦並未失守寸地謠傳

殊覺可惡除將奏報情形另函鈔送外謹電聞

寄江鄂督帥山東撫帥 十月二十七日

何奏詢仁和覆毫無影響徑電情意尙洽以上皆是保定電似係述楊語昨傅相隨員回云各使不甚見面並不與我議公事條款亦得諸傳聞似只能靜候照會耶相亦不多晤徑奏仍須戮王公數人 行在全權似皆坐等照會令人急煞鄂電變法行新政果能在美敦書以前速見 上諭必能保自主之權可惜無人肯奏卽奏亦未必肯行天寶爲之謂之何哉

袁中丞來電 十月二十七日兼致岷帥香帥

聞楊來昭甚荒唐所述斷不可信亦未必爲邸相
所遣此案要領始終在懲罪不允卽無辦法兩帥
劾毓董不報邸相請撤李卹不理今又輕描淡寫
請戮王公數人恐又不省總之全權從容坐待
行在牢不可破我輩已智盡能索實難措手行新
政一說此時言必無益

寄江鄂督帥山東撫帥 十月二十七日

頃接軍機處二十七日電 旨奉 旨奕劻李鴻章徑
電悉懿親不加刑各國通例早經聲明何獨英使反脣
其中必有別故 朝廷惟恐夜長夢多是以予該親王

等便宜行事之權不爲遙制如有爲難之處並諭令據實直陳來電吞吐其詞不勝焦慮著卽迅籌開議務期及早了結一切妥協以便定計 回鑾欽此除電京外宣謹轉

寄李中堂 十月二十七日

聞各國訓條已到恐一開議所索未能限內卽覆已派楊來昭赴秦請榮代奏俟就緒再開議此極周密但賠款能否預託二赤商議

張香帥寄各駐使電 十月二十八日

鄙人奉 旨會議條款極欲與各國籌一永遠相

安之道而久候不得的確消息無從籌計焦急萬
狀務祈切懇外部將各國所擬條款速卽詳示雖
各國尙未互相議定然亦可密以告我俾得預籌
萬望勿如洋報所言俟各國議定以哀的美敦書
照會限期應允使我措手不及辦理失當也條約
關係久遠重大必須極爲平允方能持久倘或稍
偏必致此國喫虧彼國終亦無益也盼速詳復

劉峴帥來電

十月二十八日

何奏子虛保電不確甚善惟邸相徑奏恐遽難辦
到中變堪虞昨今苦思無策諸公定有卓見祈賜

教鄂變法行新政電稿並示

張香帥來電 十月二十八日兼致峴帥慰帥

楊來昭係何處人何以膺此要差杏翁必知閣部
限人乃陳言必不確監政恐是專指財政立明齎
亦是恫喝但聞愈增愈多愈想愈狠並聞忽有萬
難行之事惟俄不願云云萬分焦急至 回鑾方
簽約大是難事然竟不 回鑾各國難允請峴帥
慰帥杏翁將卓見賜示再陳鄙說

劉峴帥寄日本李星使電 十月二十八日

聞各國互議條款議定照會計在決行無可商改

合八國而謀我何求不得惟旣存全中國須爲我
稍留地步各國當見其大以期共保和平均沾利
益趁照會未到祈切商外部電公使勿奪我自主
迫我所難關係至重舍此無策幸力圖之

寄李中堂

十月二十八日

徑奏恐遽難辦開議無期不致公照會與美敦書同來
限期偏允毫無商量否總之非戮數人不了似宜切實
痛勸微詞斷難聳聽衢案六人須議等差英領函劉撫
不得離杭現赴宜興請與薩使疏通

寄江鄂督帥山東撫帥

十月二十八日

甯勘電謂中變堪虞頃接傅相沁電開議尙無期而徑
奏迄無電 旨若專待美敦書主權盡失此時電奏未
必應然三帥不救大局休矣可否乞峴帥慰帥電仲相
香帥電定興切實喚醒再由甯鄂公電政府以濟萬一

李中堂來電 十月二十九日

各國正在會商繕條款三四日可到開議未定期
現亦無從擬議賠款本是後來事恐須俟弟來京
再商

劉峴帥來電 十月二十九日兼致香帥慰帥

楊來昭言不足信條款亦不確恫喝在所難免各

博覽有身 卷四十一 三
國公使駐華日久深知情形所謂萬難行之事當
係訛傳果有此則不能和矣恨端既深恐另有難
行之事歷觀以前陝電事定必 回鑾若先回方
簽約恐做不到亦無人敢請邸相徑奏極重極難
之件寥寥數語未知何意我輩此時無可陳奏必
待全權先言方能助力香帥所言變法新政目前
雖未必能行仍祈詳示

袁中丞來電

十月二十九日

鄂勘電悉此時懲罪尙辦不到何況 回鑾各國
定意邸相定見均難確知無從措手聞楊以縣丞

奔走宋軍往來津京集資捐同知得識慶榮榮薦
直裕裕薦奉增未知知府從何來邸相當不至以
斯人任此差

寄劉峴帥 十月二十九日

萍鄉鐵路滋事只須嚴拿爲首武童歐陽樹滋歐陽步
高重辦便可了結惟張護院守舊恐放鬆則必釀巨案
務求加電筱傳認真飭令府縣嚴辦方能息事至懇至
禱

東京李星使覆峴帥香帥電 十月二十九日

鈞電遵達外部據稱所擬條款前已備述大概現

無甚增改昨各使又會議一次雖未得電度亦無
關緊要開議一節實因有一兩國未發訓電以致
稍遲並無他意至索閱底稿彼此交誼雖密然日
本既與各國聯合不能不視中國爲敵國卻辦不
到等語傳聞英廷不以寬辦首禍償款數減爲然
未飭開議應否電羅使切商乞鈞奪餘另電密陳

寄南昌張護院紹華

十月二十九日

萍鄉鐵路被搶顧令查明係武童歐陽樹滋等三人冒
充文秀才鬧事該處刁民謠言護院不願開礦辦鐵路
膽敢嘗試此項礦路奉 旨開辦已借洋債百萬如果

毀壞又添 國家賠款如何得了公洞察時局萬分艱
危卽如此次東南保護若非各督撫嚴辦匪類安能無
事萍鄉民情刁頑而畏官法如蒙飛飭袁州府萍鄉縣
嚴拏爲首或卽在本地從重處治卽可消弭後患若一
放鬆必致誤會礦路非官事恐釀成拆毀巨案不可收
拾乞鈞裁示復

張香帥來電 十月三十日兼致峴帥慰帥

今日見自陝來人言西安京外官紳士多言敵不
能深入若添足董軍一百營必能破敵京津之敗
皆漢奸爲之端午橋得洋人銀六十萬故保護教

士等語今日又見自湘來人言湘紳多言必須戰
勝方可和由鄂省昌言保護兩湖平安無戰事以
致湘人勇猛無從施展電報局於洋勝則報華勝
則諱皆是漢奸等語可歎湘論不過執迷不悟有
礙將來陝論必致熒惑政府梗阻大計矣

袁中丞來電 十月三十日兼致峴帥香帥

鄂豔電悉陝論亦所謂夜長夢多彼此枝節叢生
款議愈離邸相宜早設法前議行新政必以養人
材爲首要士夫識見如陝湘者十居七八從何行
起

劉峴帥來電 十月三十日兼致香帥慰帥

拖延愈久枝節愈多全權卽有爲難亦只有遵

旨直陳時勢至此無所用其隱諱各省能知實情
方可相機助力請杏翁先以此意電致傅相且看
如何

寄萍鄉願令家相張令贊宸 十月三十日

頃接南洋三十電豔電悉萍鄉案今晨已電張護院與
尊意同電稿如下盛京卿豔電想達覽萍鄉武童歐陽
樹滋等三名膽敢爲首聚眾硬坐火車傷毀機器順搶
錢物並造謠煽惑若不趕緊拏辦何以儆兇頑而遏亂

萌夏秋以來江西教案多至數十起刁民藉口仇洋地方官亦不以爲非屢閱稟牘甚至以敝處爲祖教試問時艱至此若再蹈北省覆轍東南能否保全今幸台端榮握疆符務請嚴切申諭各屬一洗從前頑固之習庶可轉危爲安保全疆土守令不能爲力立即撤參萍鄉路既有德商抵款尤須切實保護並祈電飭袁守萍令迅拏歐陽樹滋等三名解省審訊果係爲首滋事卽行正法一面酌派勇隊至萍鄉一帶防護以備不虞而杜藉口盼速電復云等語務請願令卽遵兩江督部堂劉電迅拏歐陽樹滋等三名到案聽候撫飭再押解到省

審訊毋任遠颺並卽鈔電專送袁州府查照

劉峴帥來電 十一月初一日

端莊解晉稍釋羣疑毓起解是否由晉至陝尙有
後命趙請假略有廉恥然已晚矣祈杏翁發電專
探如確似可就近告知各領

寄張香帥 十一月初一日

據襄陽電局稟襄陽縣李祖蔭屢因公務強發一等局
員遵章不允本日有李令三弟祖培又勒發一等未許
李公卽發火簽其弟親帶勇役百餘人各持軍械擁局
打毀機器抄失衣物將生等沿途毆打抓至縣署收卡

幸道府派員彈壓放出等語查一等報奏明有案豈縣局所能強發李令暨弟李祖培親帶勇役毀局毆打請從嚴懲辦以儆不法等因查奏定章程督撫將軍欽差始能發一等報李令何得派勇毀局妄拏無辜實屬任性妄爲荒謬已極朱道高守先將李令嚴加申斥並查明實情電復核辦此後因要公發電只能作爲官電以期迅速仍給全費以符向章其電費由各官先墊付准向善後請領

倫敦羅大臣寄香帥電

十一月初一日

儉勘兩電遵致瀾侯據云各國所擬照會已飭薩

使詳電台端並無哀的美敦限期字樣中計十二款大綱雖決行詳目尙可商略云

峴帥寄日本李大臣電 十一月初一日

中日脣齒誼應親密聯軍入都日保 宮闕甚力
尤徵睦誼前聞日多派軍隊亦以兵多權重乃可
維持款局今英有異議日欲助中正在此時祈商
外部趕速調停日英輯睦得日力言必有濟亞東
幸甚

美京伍大臣寄峴帥電 十一月初一日

各使列款廷迭商美廷更改禍首中國自辦賠款

不列數軍火暫停購議款不作哀的美敦轉商各國皆允已電康使畫押並無不容商改之說昨晤外部知前致康電康誤作不能更改字樣與各使遠行畫押廷力請美刪改此句已允卽電康與各使商改竊謂磋商議款固屬難事尤恐款成後不復整頓破格用人再以庸臣當國必召外侮後患無窮諸乞盡籌並轉香帥

袁中丞來電

十一月初一日兼致峴帥香帥

秦探電端在甯夏莊在臨潼昨日均解蒲州暫令晉撫派員管束毓賢昨起解天水請假不復出云

又十一月初一日兼致峴帥香帥

秦又電桂侍郎奉密 旨赴臨潼押解莊邸赴蒲
州溥儀奉 旨尋其翁端赴蒲同解交晉撫看管
云

寄李中堂 十一月初一日

豔謹悉條款到後似宜遵 旨據實電奏不可再用輕
筆稷臣三十電江鄂各國所擬照會並無美敦限期中
計十二款大綱雖決行詳目尙可商秩庸電列款不作
美敦賠款暫不列數本齋電英不以寬辦禍首償款數
減爲然云密電本到否

寄西安王中堂鹿尚書

十一月初一日

傅相鑿電各國正在會商繕條款三四日可到開議未
定期現亦無從擬議伍廷芳三十電外部允改原議列
款不作美敦書禍首由中國嚴懲賠款暫不列數羅豐
祿電照會計十二款大綱雖決行詳目尙可商李盛鐸
電英廷不以寬辦首禍償款數減爲然云云蒙垂詢實
在辦法如何下手容再審思密陳但病甚深決非輕描
淡寫所能治恐仍徒託空言將致主權盡落外人之手
無能預爲挽救言之痛泣

張香帥來電

十一月初一日兼致峴帥慰帥

敝處前電因滬轉保定電有閣部督撫勿用旗員
之說竊恐有礙自主之權故謂外國與其限我用
人之籍貫不如勸我變法變法則自然相安也意
謂假如各國真有此條我可以此說搪抵之耳非
此時勸 朝廷變法也法固宜變但未有機會如
何能說濟兩電滬電似說會甯豔電囑將變法詳
告容續達

又十一月初一日兼致劉峴帥

襄陽李令及其弟妄爲已電道府查復核辦嚴飭
斷不准擾電局并派員弁到局彈壓矣此事由轉

運分局發電而起望一面電憚道速查復聞憚道
在常州

又十一月初一日兼致劉峴帥

頃致襄陽提道府縣電云據電生稟李令每日仍
令多人在局滋擾恫喝等語李令謬妄益甚可駭
可怪豈發狂耶鄧軍門朱道高守速派員弁勇役
到局彈壓不准襄陽縣有一人到局李令靜候查
辦若再妄爲卽日撤參前日飭該道府查實情形
速電復督院東等語特奉聞

寄江鄂川督帥山東撫帥

十一月初一日

邸相東電奏頃由美使署傳鈔草約各條擇由節略條款次序不能爲准一治罪禍首應按中國極重之律法從事二中國允照賠償各國各款三派近支親王一員往德國謝罪派大臣一員往日本謝罪應在北京爲故德使克林德建立石碑四凡曾滋事各地方應罰停考試五年五大沽礮台應毀去六由天津至北京沿途應設洋兵卡七各國使館准永遠屯紮衛隊八此後遇有仇害洋人之事而地方官有過其各應認罪之大小官員應永遠開除不用九凡專供戰務之材料禁止運進中國十凡治罪 諭旨及曉諭告示應懸挂二年凡團

匪壇會應令解散十一各使覲見禮節酌改總理衙門
應僅設大臣一人十二上開各條均須照允照辦後外
國兵隊方能撤去各等因查以上各節屢見中外新報
大同小異聞各使自奉各政府訓條後已會商畫押惟
美使接其國電尙有增減大致無差惟有禍首應按中
國極重之律法在彼方以我自辦爲合國體不知朝
廷久有爲難若展轉推延必致撤兵無期和局中敗應
如何 乾綱奮斷以服外人非臣等所敢擅擬除俟各
使公照會到日會議如何情形並將毓賢李秉衡各節
再行附奏外請代奏云宣謹轉

張香帥來電 十一月初二日兼致峴帥慰帥

敝處近電各駐使託向外部詢條款以便預籌茲
羅使電云儉勘兩電遵致瀾侯據云各國所擬照
會已飭薩使詳電台端並無哀的美敦限期字樣
中計十二款大綱雖在決行詳目尙可商略云伍
使電云儉電悉各使列款嚴厲迭商外部允改原
議列款不作哀的美敦禍首由中國嚴懲賠款暫
不列數軍火暫停採購照會各國均允前請傅相
轉電計登覽頃外部謂議款大致如前尙未盡妥
不便先錄查目前和議早成中外蒙福各款爭得

一分固受一分之益然自強之道尙待蓋籌等語
特照轉

寄江鄂督帥 十一月初二日

頃接軍機處東電屬轉尊處 兩宮切盼和局擬議

妥後定計 回鑾迭次 諭旨令慶邸李相如有爲難

之處不妨據實直陳許以便宜行事 朝廷不爲遙制

近慶李來電詞意仍多吞吐其中有無別故尊處當有

所聞貴督等本奉有會商之 旨貴京卿往來傳電久

經洞悉卽希電催慶邸李相從速開議毋再拘延致誤

事機前據慶李電奏聞條款尙無必不可行之事嗣又

云英使又復反齒欲重辦王公數人未識究竟是何情
形弟等籌畫挽回大局實已不遺餘力卽 上意亦權
利害之輕重可允卽允並無成見是在諸君子曲爲體
會共扶危局事機急迫務祈切告兩全權從速辦理萬
毋意存顧忌爲要祿韶霖云宣轉

寄江皖鄂川湘東豫贛閩粵督撫將軍 十一月初二日

本日京寄和議條款各國駐京大臣會定條款譯稿西
曆一千九百年五六七八等月卽光緒二十六年四五
六七等月間在中國北方省分釀成重大禍亂致罹窮
兇極惡之罪實爲史冊所未見之事殊悖萬國公法並

與仁義教化之道大相牴牾茲將其尤重者開列於左
一西曆六月二十日卽華曆五月二十四日大德欽差
駐紮中華便宜行事男爵內大臣克遵職赴總署之時
途次被奉令官兵戕害二同日京師各使館被官兵與
義和團匪勾通遵奉內廷旨圍困攻擊直至西曆八月
十四日卽中曆七月二十日爲入京各國聯軍所制而
敗京師如是而中國國家乃令使臣向各國政府傳擔
承保全使館之旨三本年五月十五日卽西曆六月十
一日大日本使館書記生杉山彬公出經官兵在城門
兇殺都中暨數外省之諸國人民又被虐殘並遭拳匪

及官兵攻擊各項房屋居室均爲搶毀若非捨命力敵
鮮克全生四泰西墳地被侮在京爲尤甚兼有發掘墳
墓拋棄屍骨之慘因以上各情諸國派兵前來保全使
臣商庶戡亂還安聯軍北上與華隊抵敵竭力敗之方
克前進中國旣已承責表明悔過顯昭定亂弭禍之心
諸大國公議允行然有各國酌定未能移易之要款若
非照辦不足以贖往愆防復燃其款列後 第一款原
任德國克大臣被害一事務須欽派親王專使前赴德
京代表 中國皇帝國家慚悔至意遇害處所樹立銘
誌之碑與克大臣品位相配列敘 皇帝惋惜此等兇

事之旨書以辣丁德漢各文 第二款一西歷九月二十五日卽華歷閏八月初二日 上諭內所指之王大臣等及日後諸國大臣指出者皆須盡法從重分別懲治以蔽其辜二諸國人民遇害被虐之境五年內概不得舉行文武各等考試 第三款因日本書記生被害中國國家必應從優榮之典以謝日本政府 第四款中國國家必在各國人民墳塋曾遭侮蔑被掘之處建立滌垢雪侮之碑 第五款禁運中華軍火暨與爲製造軍火各種器料之章照諸國所議仍不開弛 第六款一凡有各國各會各人等當肇亂時被害虧累中國

咸宜從公賠償華人因從事他國之故身軀家產殃及者同二中國務使籌出以上償款及分還虧欠之來源適諸大國之意斟酌允行 第七款諸國分應自主常留兵隊分保使館使館地界自行防守界內禁居華人 第八款京師至海面須留出來往暢行通道故與其有礙之大沽等礮台皆須一律削平 第九款京師至海之通道不便有斷絕之虞由諸國分應主辦酌定數處留兵駐守 第十款一兩年之久中國國家務須在各府廳州縣宣示 諭旨一道載明後開之端永禁或設或入與諸國仇敵之會違者無論首從皆斬犯罪之

人如何懲治文武考試如何停止一並列述二 中國
皇帝務頒 上諭一道通行布告以各省督撫文武大
吏及有司官於所屬境內皆有保平安之責如復滋傷
害他國人民之亂再有違約之行必須立時彈壓懲辦
否則該管之員卽行革職永不敘用亦不得借端開脫
別給獎敘 第十一款條約船章及另有關係通商事
宜各節諸大國裁視有失全應更使其妥善簡易之處
中國國家允行照辦 第十二款總理各國事務衙門
必須革故鼎新暨諸國欽差大臣覲見 中國皇帝禮
節亦應一體更改其如何變通之處由諸大國酌定中